

16 JAN 2003

Mahathir-rombakan

ZAID DILANTIK TIMBALAN PENERUS UMNO KELANTAN

KOTA BAHARU, 16 Jan (Bernama) -- Datuk Seri Dr Mahathir Mohamad hari ini mengumumkan rombakan dalam kepimpinan Badan Perhubungan Umno Kelantan dengan melantik beberapa muka baru termasuk bagi jawatan timbalan pengerusi, sebagai strategi untuk menawan Kelantan daripada PAS pada pilihan raya umum akan datang.

Perdana Menteri mengekalkan Datuk Mustapa Mohamed sebagai pengerusi dan melantik Ketua Umno Kota Bharu, Zaid Ibrahim, sebagai timbalan pengerusi bagi menggantikan Datuk Annuar Musa.

Annuar, yang juga Ketua Umno Bahagian Peringat dan bekas menteri pusat, kini tiada jawatan dalam badan perhubungan Umno negeri.

Perdana Menteri membuat pengumuman itu pada sidang berita di Lapangan Terbang Sultan Ismail Petra di sini di akhir lawatan kerja dua harinya ke Kelantan.

Sebelum itu, Dr Mahathir yang juga Presiden Umno, mengadakan pertemuan lebih satu jam dengan anggota-anggota Badan Perhubungan Umno Kelantan di sini.

Annuar dan semua Ketua Umno Bahagian yang lain turut hadir pada pertemuan itu.

Dr Mahathir berkata beliau sebagai Presiden Umno mempunyai kuasa untuk melantik pengerusi badan perhubungan Umno negeri dan timbalannya manakala jawatan lain dilantik oleh Mustapa.

"Saya dapati semua bersetuju dan akan beri sokongan," kata Perdana Menteri.

Mustapa, yang turut hadir pada sidang berita itu, kemudian mengumumkan pelantikan Timbalan Ketua Umno Tumpat, Mat Nawawi Mat Jusoh sebagai Setiausaha Umno Kelantan bagi menggantikan Ketua Umno Kubang Kerian, Tuan Mohd Hashim Tuan Yaacob.

Timbalan Ketua Umno Peringat, Mohd Alwi Che Ahmad dilantik sebagai Ketua Penerangan menggantikan Datuk Ismail Mamat yang juga Ketua Umno Machang.

Mustapa turut mengumumkan pelantikan Timbalan Ketua Umno Bachok, Datuk Dr Awang Adek Hussin sebagai Bendahari menggantikan Datuk Dr Nik Hussin Abdul Rahman.

Dr Awang Adek adalah juga Pengerusi Tenaga Nasional Berhad (TNB).

Dr Mahathir berkata rombakan itu bagi mewujudkan gandingan kepimpinan antara muka baru dan lama agar Umno Kelantan terus mantap dan mendapat sokongan padu rakyat.

"Saya fikir sekarang ini rakyat Kelantan beri sokongan tetapi kita perlu memperbaharui kepimpinan dari semasa ke semasa. Bukan bermakna pemimpin yang lama tidak dapat menjalankan tugas tetapi kita kena beri peluang kepada orang baru," katanya.

Ditanya adakah pelantikan Zaid itu hasil cadangan Umno Kelantan, Dr Mahathir berkata itu adalah pilihan beliau.

Dr Mahathir berkata mesyuarat itu turut membincangkan strategi untuk Umno dan Barisan Nasional memenangi pilihan raya umum akan datang.

Ditanya sama ada strategi itu melibatkan calon-calon muka baru bertanding kelak, beliau berkata: "Sememangnya mesti ada muka baru, dan muka lamapun mesti juga ada, tetapi belum sampai tahap itu lagi (untuk dibincangkan)".

-- BERNAMA

BD MAI

